


別 5
1570
15





1570
卷 15

寧波府志卷三十五 傳十一

南京兵部尚書郡人張時徹纂修

寧波府知府直隸安德曾 鎰訂正

義行

宋童判子鄞人逸其名嘗為典庫稱為判子家養
疎屬數口奉寡姊承順不違其甥不事產業屢負
人債輒為償之不以告姊王安石為鄞令物色之
遇以賓禮

祖域字貞夫建隆中由閩徙奉化仕至殿前司統

制平居尚氣節樂施與既沒民懷其惠立廟奉之
本朝封為義士祖公之神

馮制字公初慈溪人少敏慧涉獵書傳善文天聖
中舉進士篤於養親遂絕仕進家裕好施康定間
里大饑民相啖食家有穀數千斛悉貸之賴而全
者百餘家舍東有古陂縣長牟經俾鄉先生王致
揚適畊之民數奪其豬水制諭民穿古渠引潮以
溉無復奪水之擾二先生割田為壽制卻曰吾哀
先生窮耳豈望報邪逾錢唐會故知錢寺丞負客

債數百緡索之急悉與償之居嘗聚族子弟誨之
務中規矩未幾弟準子碩姪景相繼第進士躋顯
位鄉人榮之

豐有俊字宅之四明人稷四世孫也登青樓見小
娼疑故人女累目之女亦悟酒罷留宿女羞澁良
久曰豐官人識妾否詰之果故人女豐曰某所以
留者以坐間不得問也宜各寢必有以處汝娼遂
退豐與京尹有舊明日以白尹且曰某僅有錢八
千從公更貸二百千嫁之尹嘉其義即取入府厚

奩具擇良士嫁焉尹即王宣子佐也山陰人朱熹
同科進士第一人

黃子游字叔言先浦城人後徙奉化崇寧星變父
宰上封事論蔡京京怒逮赴御史獄長流海島子
游號訴於朝父得不死建炎初客南京歐陽徹以
上書忤宰相黃潛善坐棄市子游適同邸脫驂以
葬且調其子以歸張忠獻公每對客誦言曰子游
義舉近世所無也忠獻謫永州子游歲遣人致問
守池州青陽縣縣以宋齊丘食邑田賦十倍相仍

餘二百年子游奏蠲其半中歲不願仕食祠祿十
五年築聽雨堂兄弟相友官其猶子竭貲嫁兄之
諸女卒年八十八

李猷字嘉仲一字獻夫鄞人建炎初以婦翁沒王
事自京師詣南都行在所遇友人陳東少陽被召
至舍館未定乃爲假館於太僕寺丞陳正彙少陽
再上書不報有榜通衢斥附會李綱者猷知爲少
陽將勸之歸而少陽已逮赴應天府隨戮於市猷
哭且祈曰少陽以忠諫死勁節英氣當不與草木

同腐吾欲收少陽歸葬而莫能得少陽有靈其啓我心越一日得屍又一日得其元合而歛之方買舟東下會其鄉人胡中行從太學來欲親護柩猷服其義并以行李付之猷亦不暇詢婦翁事亟還

京師

林暉字公著鄞人任韶州司戶恂恂孝謹輕財樂施大觀間陳忠肅公瓘寓於鄞暉獨厚之夜雖從謫他所問遺不絕建炎四年明州燬於兵暉未暇葺舍宇首捐錢數十萬理學宮且輟田半頃爲養士費太守以風郡人巖舍始漸復舊貫

汪汲奉化人與弟份並好義樂施子嘗捐貲建郡學大成殿及橋梁七十二處今宋晉之請於參政樓鑰記其事汲以子厚貴累贈朝議大夫份官監鄂州戶部大軍倉

蔣員外定海人逸其名仗義矜節不纖嗇於財子姓不類鬻田產者必隨其價市之逮久度其無以自給舉以還之不責其償已而又賣既買又還有至數四者卒無厭意嘗泛海欲趨郡爲回風所擊

泗水舟人挽其衣救之不可得舟行去溺所約十里許遙見一人冉冉立水上隨風赴舟視之乃蔣也亟引之問所以曰方溺時覺有一物如蓬藉吾足適順風吹故得至人以為積善所致云

陳大雅象山人天性明敏與人交以信親族里黨有乏調卹之無少靳嘗舍逆旅遇邸客病將死同舍皆散避大雅晨夕相守躬治湯藥傾囊中裝給之俟愈始去人服其義大雅工於詩趙清獻公抃深器重焉

李珂字公執奉化人寬厚簡朴好周急施予梁三江甃途路收恤孤惻教養姻族朝奉郎王伯庠銘其墓謂持心廣大與造物者合有傳家龜鑑行世官秉義郎

袁昇鄞人初為小吏給事通判廳勤謹無失歲滿當代不聽去後通判至復留之家積以裕近五旬無子往臨安置妾既而察知其為四川故趙知府女也即還其母母泣曰計君聘財猶未足給歸費用且破矣將何以酬君昇曰賤吏不敢當此願以

聘財相助知其不給又罄橐以贈歸告其妻妻喜曰君設心若是行當有子矣明年生子韶官至叅知政事贈太師越國公曾孫楠官至翰林侍講學士贈叅知政事陳郡公各有傳

元童金字子丹慈溪人家素饒裕至元間以才能薦授進義副尉歲督海運秩滿退扁所居曰一間築堤浚澤興水利於鄉仲父鞫拙於治生服食咸資之終其身不怠即先廬側築室百餘楹爲義塾割腴田四頃延師以淑來學別置田二頃代鄉鄰

之輸及給貧不能養死不能斂者大德中歲饑流殍相望金發積以貸全活者衆有司奏旌其門陳紹字成甫慈溪人志尚澹泊家饒於貲而衣不重裘食不兼味事親盡力延師課子姓惓惓以孝弟忠信爲諭接物平恕人稱長者遇鄰里喪不能舉者葬之死不能斂者資其衣棺貧不能自存者賑以粟里有金姓者窶甚紹憐之密於暮夜持錢投其家時邑治闕官舍令富德庸嘗主其家紹每告以撫字當急瘠民肥已君子弗爲令終任一介

不取及行囊橐蕭然適長女死紹爲之歛且出所積以助其歸邑饑發困以貸賴而全活者衆陸芟祐鄞人個儻好義慕性理之學爲儒者規欲建義塾以教鄉之子第未就而卒遺命其子居敬思誠置田度基構學一區於東湖之里崇奉朱文公像浙東帥王本齋命名曰東湖書院割田一頃六十畝有奇以爲報祀餼廩之需建先進祠祀鄉先生陳文介公而下凡十人延師講學以淑一鄉子弟積三十年時人莫不嘉之

倪天淵字震亭鄞人修髯廣顙氣和行樸與人交終始一致家饒而性尚儉素一冠十年不易事親竭力樂施予窮乏者假貸無吝色有負逋者即焚券不責其償歲大疫手製藥施之時江南歲漕白粳經海達畿天淵籍占漕役躬自蹈海有舟十艘每運數萬石操舟之卒千人一束以紀律他舟或滲漏米腐不可餉即以餘貲代補之至元戊寅漕舟多沒於風天淵舟漂高難上衆欲捨舟天淵不從拜且祈俄而神炬見桅端光輝燭人風回獲濟

積四十餘年中臺御史袁賽因不花按行海道嘉其盡力王事且年高行篤狀聞於朝旌之曰高年耆德之門天淵辭弗樹臺察廉知其事促有司亟樹之仍復其家後子可輔仕江浙行省叅政天淵自處如平時出入不乘輿馬

薛通字德明定海人朋龜七世孫自鄞徙定海嗜善樂施人告以不給輒捐所餘賑之後因子業儒對衆籲天焚其貸約臨終復以囑其子迄今昌國人都呼爲外公云先宋時朋龜祖父五代同居號

爲義門通復如是邑令陳軾爲扁其居曰崇義

樂大原字君道定海人器度宏偉慷慨多大節居家孝讓事繼母尤謹燕閒無惰容恥言人過失大德丁未東浙大侵大原發巨艘販泉南廣東之米平價使人就糴遠近畢集活者甚衆父占籍清泉鹽場亭戶凶歲官不降本亭戶失業大原發貲視官本增三之一以貸諸戶隨其力之所及而收其入被惠者德之有持舊書易米濟饑者輒應之遂蓄至數千卷曰吾子孫必有能讀是者孫良果能

讀其祖所藏書屬文數千言立就時朱陸異門良受業程端禮學以朱氏爲宗一時名卿若黃文獻公潛王文忠公棐咸器重之洪武初爲定海縣學教諭以學行表帥後進有遺稿五十卷

應本仁字本立鄞人曾大父伯謙爲宋觀察使以忠直名由伯謙而上逮衛國文敏公僭歷世顯于宋本仁以家世爲宋臣義不仕元隱居城南博學好禮愛人喜施慷慨有大志嘗慕范文正之爲人規建義莊創屋舍五十餘間割慈溪腴田五百餘

畝收其歲入以濟親族里黨之貧乏與婚姻喪葬之不能舉者又即其中爲義塾延名師以訓導親族里黨之子弟供膳服用悉有常制時其出納定其條約使後裔世守之郡府以其事達宣慰使司行中書省移浙東廉訪使者覈實以聞褒嘉之時翰林學士黃文獻公潛爲紀其事于石故世傳爲應家館云

國朝方德初字孟仁奉化人四世同居百口共爨子二人從子十一人以其貲產均分之凶年爲粥

以食餓者鄰人鄭氏以貧鬻女爲人婢德初爲贖
還之其自奉甚薄而性樂施與多類此與弟德全
並美德初年八十八德全年九十九卒

張迥字仲延鄞人年十五爲郡諸生師事天台孟
頴氏即業出諸生上會世已亂方國珍竊據台温
明三郡諸以策干國珍者咸領職分城貴矣迥獨
不以策干國珍既而天兵指明國珍納款諸事國
珍貴者咸遜逃或以法誅死迥獨全其家人以爲
有神識云比 高皇定天下迥以才薦徵至公車

遂托疾辭歸力穡務本家愈益高貲顧愈節齋數
賑施鄉里貧者時兵後歲大饑括草木食乃盡出
其穀粟活人人得活則盡出其借券焚之由是迥
名聞郡中矣四方逃難之士日過迥又輒與館穀
輒又名聞四方有四男子長叔謙次叔誼次叔謹
次叔謨好禮尚義遂大其門叔謹孫綱以貢任蒙
自縣丞纓以貢任延平訓導纓子懋賢正德甲戌
進士叔謙叔誼孫曾舉科第者別有傳

陳與延名延以字行鄞人記覽該博而尤熟於春

秋家頗饒產悉以散諸親舊之貧者僅存周廬田數十畝朝耕暮讀雖際屢空絕無怨悔洪武二十七年邑大夫多其賢薦授本邑訓導開道後學諄諄先義後利一言一行惟恐或後古人故當時從游之士接其範模者率知敦尚古道云

謝茂字茂之先會稽太傅之後隱居桃源西眺山爲人端謹尚節義襟度灑如招致賢士大夫談論古今時烏斯道袁廷玉胡世佐故皆高品每相與過從歌詠爲樂鄉人鮑原祥以兄子忠任監察御史卒無葬地謀於茂茂曰我有地陰陽家謂爲貴局雖千金不易也願以葬忠已又割地葬千戶湯文之母後二家各出金以酬茂拒不受

王汝林奉化連山人性倜儻好施凡貧病過門者接之不厭遠近慕其名陸司寇瑜時爲邑庠生貧不自存往詣林而兩人素昧平生林時浴於溪陸以謁告遽起而入攝衣延之盛爲之禮次日林即遣人濟陸之家然不以告也比留連旬日陸乃自言其情曰竊慕公子高義幸而款我其如家累何

則出陸家謝啓示之陸起拜曰不虞君之恩吾深也辭之歸明日林乃張盛具觴而送之凡寒暑之衣畢備且贈之白金陸辭弗得陸貴不相聞者久之及陸以刑部尚書致仕還謁郡守李行見籍諸人於壁汝林預焉陸問此壁間之人善邪惡邪以爲惡則善人在焉以爲善又何善之多邪李曰否此皆積惡吾欲置之死耳陸曰餘人吾弗知若王汝林者豈非奉化人邪李曰然然則公誤矣因備道其善狀而汝林弗之知也蓋於時台有解盜者

汝林遇諸塗曰盍搗殺之盜聞而憾之誣爲窩主李卒釋而弗問竟亦不爲謝不辭謝與何瞻胡純俱鄞人正統間同升國學胡疫寢內舍鄉里姻舊避之無一人問者瞻晝夜視其僕饘粥煮藥七日候不應瞻憂之解衣與並枕抱臥得汗瘳瞻亦無恙後瞻任刑部主事純工部主事並李貴北直隸金吾衛李得第也正統間得死子勝立甫五歲調定海衛貴越數千里襁負之而至人或說之曰君盍自爲計萬戶侯非孺子有也貴輒

罵曰人而獸邪孺子可死吾心可死邪卒保護之
惟謹及襲爵輔以政事且戒之曰君父不可負也
立用成立人咸服其義

陳處廷虞陸虞玖李浩丘本厚沈志道周得延任
福朱茂春潘本餘皆鄞之著姓先世力田桑豐儲
廣土至處廷輩益殖貨樹農富埒封君 英宗北
狩徵發繹騷又歲侵艱食民不聊生困庾無可發
者處廷倡先奮義輸粟二千石備賑虞陸與弟玖
及李浩聞風興起輸粟如處廷而丘本厚以下諸

人各出穀有差賴以全活者衆有司嘉其行誼上
聞於朝特賜璽書勞禮旌爲義民樹之綽楔嘉靖
戊戌知縣沈繼美立石縣門彰其義以風四民其
時又有王勲亦以輸粟給賜冠帶其後則有楊苗
苗字德成亦鄞人慨慷多大畧倡義急難有古萬
章卜式之風成化間詔民輸粟助邊一時未有應
者苗獨出粟二千五百石躬輸之邊 皇帝特賜
璽書立義門旌之

周璋字廷珪象山人生而穎異讀書過目輒不忘

寧波府志卷三十五
成三
為文淵蓄淳泓下筆千餘言立就弱冠領成化癸卯鄉薦明春試禮部中乙榜授海州學正甄陶士類率先德行一時學者欣欣向方性慈惠好施予凡子弟貧乏無以資力學及婚葬不自給者悉賙之俾各得其所人以行誼稱之子希程舉嘉靖辛丑進士

丘鎰字世重象山人好讀書務為躬行處家以禮接人以恭輕財好施歲歛貸人輒焚券不責其償有商人趙姓者遺數十金於道鎰得之坐待失主挈而還之縣令吳允裕高其義為銘其墓

楊允恭名欽以字行鄞人先治舉子業累試不第憫鄉人湖田重稅之苦鬻產走京師累疏闕下濱死者數迄不為止卒得請行省勘覆郡守林富力主其議得從慈谿花嶼湖全折之例民困用舒為祠祀之事詳德惠祠崇德祠碑中
司馬氏曰延陵懸劍不以死背心虞卿捐相印以抵魏齊之急他如樊重之焚削文契王忱之殯死埋金要皆仁心自然覽睹史冊有餘榮矣余觀判

子諸人高誼卓行率多委已殉人詎可以通顯側
陋異視之乃若汝林陸司寇事尤可異焉微時相
結貴不相聞即朱家不見李將軍而脫林於難林
卒不謝猶范滂之處霍譖也人故兩高之諺曰樗
李不言下自成蹊言有實也士不虛附名不虛立
信哉

寧波府志卷三十五終

寧波府志卷三十六

傳十二

南京兵部尚書郡人張時徹纂修

寧波府知府直隸安德曾鎰訂正

清操

宋翁升字南仲慈谿人力學有志少從安定胡先
生受易入太學登元豐五年進士第出仕洛守官
箴濟以廉謹當路才之元符中上書言事切中時
病用事者方主黨禁錮賢士大夫籍升于初等自
是沈于選調建炎初黨禁解將召用之而山林之

志已不可奪升自奉簡薄而勇於急人睦親卹孤
平糶賑乏鄉人敬之諱升斗之升字曰方斗云
吳秉信字信叟鄞人剛簡自信家貧聚族以居登
何渙榜進士初爲國學官張魏公浚以和國公奉
母居潭州築第稍廣檜忌浚復出諷中丞万侯高
論浚卜宅僭擬家有五鳳樓命秉信奉使察其事
至則以檜意告浚言浚所居皆人臣制堂曰盡心
浚嘗記之樓實無有也檜大怒黜秉信後爲吏部
侍郎與凌景夏言張備不宜爲兩浙轉運判官備
內侍張去僞所薦也上不悅以景夏出知外郡秉
信知常州未幾疾卒

曹粹中字純老定海人宣和六年進士李莊簡公
光媚秦檜在相位光時爲叅政檜知其名欲識之
粹中辭不赴竊語妻曰汝父必不能與丞相久處
光卒貶海南粹中不復仕自號放齋有詩說行于
世後張魏公力薦于朝通判建寧府曾孫孝先李
全叛楚州死之孝先之子說字習之幼歲痛其父
歿絕葷酒婚宦刻志問學五經有解後學問難壘

冬三十一
冬三十二
冬三十三
冬三十四
冬三十五
冬三十六
冬三十七
冬三十八
冬三十九
冬四十
冬四十一
冬四十二
冬四十三
冬四十四
冬四十五
冬四十六
冬四十七
冬四十八
冬四十九
冬五十
冬五十一
冬五十二
冬五十三
冬五十四
冬五十五
冬五十六
冬五十七
冬五十八
冬五十九
冬六十
冬六十一
冬六十二
冬六十三
冬六十四
冬六十五
冬六十六
冬六十七
冬六十八
冬六十九
冬七十
冬七十一
冬七十二
冬七十三
冬七十四
冬七十五
冬七十六
冬七十七
冬七十八
冬七十九
冬八十
冬八十一
冬八十二
冬八十三
冬八十四
冬八十五
冬八十六
冬八十七
冬八十八
冬八十九
冬九十
冬九十一
冬九十二
冬九十三
冬九十四
冬九十五
冬九十六
冬九十七
冬九十八
冬九十九
冬一百

不倦酬答從故家借書輒先請書目一閱即能
言其本末平生無喜愠嘗戒學子絕人我則天理
自著爲易解全書分辭變象占學者尊爲泰宇居
士詩文三十卷精潔可傳

陳卓字立道鄞人居仁子登余復榜進士知江州
移寧國時道繇臨安丞相欲見之卓謝不往丞相
益器之後官翰苑李全反淮安卓草詔暴其罪三
軍萬姓聞之泣下是歲太廟災卓又草罪已詔遠
近感動端平二年卓爲簽書樞密院事御書世綸

堂賜之未幾句祠還里平生不治產業以贊書所
酬金築世綸堂退居十有六年終始一節壽八十
六薨將葬事不能具丞相吳潛貽書制置使助之
諡清敏所著有玉堂西掖制稟三十卷菊坡集十
卷

蔣峴字伯見奉化人性剛不阿慶元二年第進士
授太常掌故改武康令有治聲調嵎縣燭幽擿姦
民以爲神後薦拜右諫議大夫事有不可必廷辨
面折端平初除殿中侍御史兼侍講侍讀史嵩之

欲開督府與樞密李宗勉論不合私請劾之峴曰
宗勉無過臺諫乃耳目官豈受私請邪峴嘗劾鄭
良臣上曰良臣高之所舉峴對曰公論不容臣不
知有嵩之也嵩之復以書罪蔡範袁肅等峴曰此
有用之才不可誣也因自警曰勿欺心勿負主勿
求田勿問舍號四勿居士官至寶章閣學士卒
王文亮奉化人嘗渡浙江有忘白金百斤者留守
三日以歸之後以壽終王荆公誌其墓
趙汝擢字待用奉化人廉謹不苟取官至承宣使

嘉定五年南安郡西溪洞尹彥輝跳梁汝擢挺身
諭之彥輝頓首泣謝曰天賜公活我郡賴以平後
被命經理蘄春事擢節有方雖府庫充實未嘗一
開宴瀕行有牙契錢七十緡吏白當得之斥不受
教官葉逢以母夫人年高爲勸汝擢自指其頰曰
鄙陋相豈更望溫飽邪後死無以歛朝廷聞之給
喪葬費以表貞白封奉化郡公

陳肖孫字伯嚴奉化人舉進士鯁介清苦操筆決
詞訟曲當事理賈似道爲相不樂四明士獨黃震

陳肖孫爲名監司士論莫易也以提點刑獄守嘉禾郡帑不妄用絕互送禮蠲逋錢二十萬米四萬子姪合食唯蔬食脫粟人呼爲菜湯知府會安吉寇作以措置失宜罷澤不及子朝議惜之丞相署曰陳肖孫一廉可取當官其子

方山京字子高慈谿人父季仁第進士爲南安軍教授季仁未第時素有文名餘妣孫氏禮致之妻以女而授之屋率族子弟稟學焉山京即孫氏甥也幼孤旅泊外家固窮力學登丙午鄉薦景定三

年廷對第一或以策尾簡短勉令增入山京正色曰吾平生所學在無自欺今既徹上覽將誰欺乎聞者竦敬初授承事郎簽書平江軍節度判官時有星孛於井色熒竟天山京適衡文天府用策諸士極言內帑之私公田之擾比出院言者希上意疏劾之山京遂拂袖而歸杜門教子蕭然自適度宗登極徵用添差通判安吉州主管建昌軍仙都觀得疾不起

妣解孫字應獬登孫之從子慈谿人宋末舉鄉薦

補國子助教正身率下勤於啓迪館士叩其淵源者屢滿戶外秩滿館下借留於銓部乃以上聞改學錄數學益孚登孫前爲司業諸生稱爲東南遺老獬繼之人以爲世典成均善於其職尤所罕者獬博學清介爲文本家傳皆以蘇氏擬之及元混一不胥于仕即退隱雙峯別墅卒之日至鬻衣以葬所著有雙峯文集詩稿行於世

元舒莊字子臨奉化人性介特以名節自勵讀古書史疊疊不倦至正間以文學徵仕浙東道都元帥府都事能聲振起改知奉化州因方國珍僭據隱居退避 國朝薦辟竟辭不赴

孫元蒙字正甫鄞人少孤性資俊爽勤學好問補郡庠弟子員學詩於鄉先生魯月卿同門皆出其下性坦夷介然有守嘗爲郡庠司訓一言少忤遽引去郡守謝留之不得俾攝鄞學事食其祿固辭不受家貧僦屋而居講學自給尤篤於倫理與人交久而益敬翰林柳貫黃潛卿危素皆重之

國朝陳宗問名裕以字行鄞人通經史善書法舉

進士歷吏部主事陞河南布政司叅議廉介有爲
人不敢犯巡治河道衆不勞而功成以事去職從
駕北巡還授行在吏部考功司郎中嚴於黜陟曹
局肅然出守武昌奏楚府侵占民地被譴因而縻
役石窰時有例顧車運磚贖罪武昌屬官醵錢代
運力拒之在役踰年工滿復職道出臨清而卒清
介之操天下一人官考功時司務鄭誠敬憚之如
嚴師後鄭居文選爲侍郎見鄴士必問宗問子孫
何如終身敬慕不忘

任壇字廷堅鄴人登胡廣榜進士知桂東縣秩滿
擢監察御史陞江西按察司僉事剛介有守字牧
之恩洽於桂東冰霜之操肅於憲臺御史時守制
于家三年足不出戶限守令謁吊惟哭踊對之不
接一語同邑爲御史者若柴履姚兼善皆砥礪操
行以才能著名而履之居喪一如壇焉士論高之
李山如字伯偉鄴人永樂間以稅戶人才授鴻臚
序班積資陞兵部郎中屢奉使命嘗同石亨紀功
大同風采壁立忤尚書陳汝言致仕歸後先歷官

四十餘年清苦一節孝友天至非奉母不御酒肉
貧寒不改韋布比歸抱書甕牖間讀之環堵數椽
躬任井臼之勞時人稱爲擣穀郎中塵生甌釜饗
殮不能自給恩詔歲給月食米五石進階朝列大
夫及卒有司襄葬事子德字克明讀書能詩文以
市鬻糊口貧不能具稿鄉人憐而頌之

宗顯字必彰鄞人正統九年舉人任宜興知縣辯
察民冤一介不取人呼爲宗青天爲之謠曰二三
萬戶皆傳說八九十年無此官陞太興知縣陞

官校見其清苦亦不忍犯陞南京都察院經歷服
闋以不樂進取遂致仕家居貧不能存在宜興時
年四十餘未有子民聚禱於羣祠遂得子因名佑
登庚戌進士主考徐溥拆卷見其名大聲言曰有
天理有天理衆愕然溥曰此我清廉父母宗公子
也天報不爽如此後宜興治解有祟後令苦之或
告之曰宗公正直盍設神位鎮之祟遂息佑字元
吉任刑部主事陞員外郎穎敏績學以詞翰名守
制早卒無後士論惜之

金湜字本清號太瘳生晚號朽木居士鄞人幼有
異質甫髫輒能詩誦長益宏肆漁獵墳史中正統
辛酉鄉試升太學後以習古書法授中書舍人待
詔文華殿陞太僕寺丞時監牧者多以墨敗孳息
日耗士恥居之湜獨奮曰貪泉豈能污廉士耶即
日乘傳詣部釐剔宿姦風節琅琅國人相顧駭曰
此鐵漢也 憲宗即位敕賜一品服使朝鮮朝鮮
雅尚文學凡中國使至必求詞翰嘗之湜即席數
十篇立就其國素號才俊者輒吐舌不敢出語因

請湜所經歷題詠刻之名皇華集又選美人入侍
湜以詩却之還朝尋乞致仕後屢徵不起居間二
十年足不一跡公府雖親黨慶唁多謝不往唯與
名勝士結社爲樂居嘗坐臥一小樓操弄觚翰篆
隸行草綽有漢晉人風度又善寫生性尤嗜竹人
有丐者輒忻然命筆不經思致而姿態橫發儼若
天成隨綴小詩其上流麗可愛人得其片楮珍之
暇則過僧廬吟諷忘倦一日口占一律示僧云都
將浩氣還元化只把清風付後生後數日果卒湜

事親以孝聞居喪盡禮中書時以書法薦弟溥仕
至池州守與諸弟姪分田宅讓肥美人以是高之
劉洪字文裕定海人登景泰五年進士積資陞武
選郎中劬勞國事諸司推最賜四品俸成化四年
原州土達叛八年達賊寇延綏兩次奉勅紀功
瀕行時威寧伯王鉞兵部尚書項忠語洪茲行當
陟通顯各以子弟相托欲爲之地洪曰予奪國憲
也敦憲干澤豈臣子所敢爲哉益嚴首功斤斤一
無所淆將校帖服焉比旋王項陰左之止升俸一

級已乃迫於公論陞廣東叅政竟落職歸時年四
十二卜居鄞之月湖日爲詩文自娛有夢軒稿暇
則蒔蔬種藥茹荼攻苦如儒生然洪天性伉直人
不得干以私云

朱瑄字廷璧鄞人自幼穎異書過目成誦久而不
忘第己丑進士釋褐奔祖母喪極力營葬足不入
城府服闋郡守以白金爲贖謝却之已授工部主
事督修通州倉漕舟附甓至故事輸紙乃得納甓
積紙至鉅萬皆充其私瑄悉罷之貧不自給至鬻

釀以供修醴釀不售即金不炊已而改營繕監稅
蕪湖蕪湖故利數少乾沒可坐致千萬而瑄獨一
不染乃大弛商征而稅入倍溢常數已又改兵部
進員外郎郎中時陝西大飢人相食奉命出賑鳳
翔稽戶定籍惠利惟均其鼠竊而囚繫者原之曰
此偷活一朝之命豈故乎乃又給穀種牛具課流
民還耕所活凡六十萬有奇陞河南叅議適旱蝗
相仍即以行於鳳翔者推之進本司叅政撫治流
民歸逋逃劾貪暴戢豪強治決河不遺餘力陞本

省右布政使進右副都御史巡撫南畿興學造士
備荒恤灾罔不盡力如築捍海巨防建太倉新治
疏徽州歲辦之增派禁京邑額外之科擾豁各縣
無徵之額糧均下戶秋糧之折布尤表表大者已
而不勝勞瘁行部太倉忽中風醫謂得鹿血和藥
宜可治瑄謂吳中一鹿可直數千文乃命破耳取
血僅足和藥而還之疾愈遂請告以歸老稚遮道
哭泣爲繪圖立祠祀焉瑄平生義利之介最嚴有
齒及賕賂者輒拂然變色敷歷中外幾四十年而

家無餘羨器用陶匏內子無金珠之飾郡邑大夫
論其匱缺嘗以薪米餉之一無所受會歲飢家且
絕食都御史王璟適奉命賑濟饋之米四十石瑄
謝曰飢民則有之寧有饑官乎妻子竊尤之當道
嘗檄堅綽楔固辭曰煩官錢用民力死不忍爲也
終其身請托不至于耳貪墨者見即赧然童兒有
戲以紙錢爲貨者人止之曰無以爲也朱都堂不
愛真錢况假錢乎其爲市井人所知信若此卒之
日貧無以爲歛至貴棺于市瑄廉介正直可質於

神明可表於汗簡又多及民之政乃其子孫微矣
箴箠田牧至無以爲家君子謂天道果可知乎

陳振字時起鄞人生而靜慧成童爲郡庠諸生輒
有聲成化辛丑舉進士宰吳縣縣故劇邑鎮以廉
平門罔私謁政清訟理陞監察御史所至皆著風
采諸所罷舉及陳列章疏一不以語人親故莫得
聞其詳轉福建按察副使連遭大喪服闋除雲南
副使遷苑馬寺卿尋上章乞骸骨會有命徙官遂
以山東右布政使致仕初逆瑾竊柄諸以事至京

者多執贄其門而振起家艱赴部顧獨不見瑾瑾
心銜之比至雲南值邊寇煽亂設策冒矢石執訊
獲醜南徼肅清瑾索其瘢不得名且益顯平生卑
言危行好勝者輒遜不爭明於界分恒以禮法自
防即絲毫無少貸假于官于家截如也歷仕凡三
十年免而歸田室廬蕭然疏糲僅給足不踰戶閭
口不及時事親故罕得見其面已而子孫死喪且
盡病卧一榻終不干於人竟亦無省恤之者遂餓
而死張尚書邦奇嘗悼之曰世稱仁者必有後若

公所謂仁者非邪而天顧盡褫其嗣復顧頷以死
天道其可知乎然祿位名壽既以其獲生而足範
於鄉沒而可祭于社孰謂天道其不可知乎

向錦字中美慈谿人舉進士除東流令從容不見
設施而民以安裕御史以循吏薦擢鳳陽同知值
歲大侵侍郎王瓊承命賑濟按籍給散惟上著者
得食流民多孳死錦憐之白于王爲計口給食數
萬人無一譁者王特疏薦之陞南禮曹爲廉州知
府安南夷黎飯因國亂脇居民百餘越屯廉界中

欽州以獲寇申御史御史方偉其功夷皆論死錦
審之皆携老幼提筐牀藍縷無一兵仗力爭于御
史以爲夷人越界罪止首惡餘宜遣還御史怒以
受賂失出奏其後事雖得白而錦竟免歸合浦產
珍珠採取費鉅萬錦一無所私歸裝蕭然馮志迎
謂曰真廉州太守也以所居讓二弟得葑田築室
其上籬落不捍風雨夷然安之錦博學強記爲詩
逼盛唐有寓廉集左氏咏和梅百咏竹坡稿
馮志字行甫慈谿人清方寡諧出守汝寧豪猾剽

御空商貨根窟定潘史懼株連請微其獄辭志不聽
大開門捕羣不逞痛治之藩府人織織覘伺莫之
敢撓猾盜屏息 武宗南狩蹕次不常檄報所至
皆儲上供物又前途賄諸嬖倖志獨不爲休備具
簡而法不致珍異既取道維揚帑無虛費竟以勁
直忤上官得河東轉運不踰年遂歸市宅僅容身
布衣藿食迨如也關小齋凝香靜坐杜門不與慶
吊不履官府有巡按來自汝寧其父老囑之曰爲
我好酬馮大夫比至浙敦請至會城思有以厚之

卒謝不往巡按行縣特爲登堂致父老之意云性
耽圖史得佳書佳句如良田美稼以此終其身
顧英字順中慈谿人由進士知萬載縣素稱難治
大家多匿田英爲清版籍不貸豪右齊民輸賦如
歸陟南御史條陳時宜四事以裨聖政僉憲湖湘
清操凜然陞四川建昌兵備副使建昌僻在西徼
前官鮮蒞其地英至上官相率致餽中多重賄英
諭却之戎益感畏上官高世仁拒命奉敕征之不
踰月獲元惡西徼即叙竟以剛直忤時致仕歸田

三十年冠履整肅規談矩步不爽尺寸性耽書成
癖弱冠至老無一日廢有四書正義南臺奏稿臺
中文義通義節要論學新稿發齋集若干卷

劉滂字伯雨由進士歷官禮部儀制郎中綜理嚴
密人不敢干以私吏胥有犯雖鄉曲不貸同邑沈
廷評光大忤朱寧下獄欲置之死滂周旋調護得
不死宸濠圖復護衛兵以樹爪牙謂漸不可長劾
之又鑄黃金爲象戲白金一千遺以結權輒下令
各兵馬司逐之滇南守臣龔爵以白金爲贄峻却

不受崇德胡姓者服役中官賂之千金求爲孝子
滂笑曰豈有失身閹豎而得爲孝乎其人愧而去
歲時表箋護絹山積先是多私爲家人用或告之
滂曰輅馬之芻不蹴况表箋所餘邪以久資陞南
京尚寶司卿便道還家感疾卒無以爲歛鬻所積
書及故衣始克襄事

王汾字本源慈谿人賦性誠確操行不欺茹苦談
經無廢寒暑舉鄉貢爲歙縣教諭聘主考湖廣鹿
鳴歌罷翻然登舟諸餽物悉不受監臨爲移文巡

按必致其儀巡按以爲不辱所舉獎之陟南豐令
監司待之倨輒詣府乞休時寧海王度爲守亦峭
直不阿強留之及覲期遽稱病篤歸例當黜罷而
當道重其廉直竟不罷陞淮安通判醴院委掣鹽
徽商以千金進叱之行縣督稅縣吏以常例進不
納既而令因元旦進謁使吏潛投案下而出汾得
之亟閉門捕吏令懼請罪汾慰之曰吾忍汚君以
賣潔邪徐令出物而去在淮閱歲竟浩然歸
吳乾養象山人三歲失怙家且落母俞氏守節教

養有成丁酉領浙江鄉薦授星子令邑衝凋敝民
慣囂訟養至愛民省費禁姦息爭釐革夙弊殆盡
不著能聲當道交薦甫三載陞鈞州知州以勤勞
過度未行而卒養介潔自持囊篋如洗喪既久力
不能葬人咸悼之

司馬氏曰首陽峩峩潁水泯泯貪夫夜過能不惕
然媿之乎清修之士砥節立名雖沉跡溝壑而不
爲齷齪汚邪之行以自點染非其性與人殊蓋仲
尼抗浮雲之志回也安陋巷之節名教具有違心
則恥耳故推遠倖門垢視貨府此其志何如也卓
峴在宋皜然不汚陳振位都方岳山如身爲郎官
卒窮餓以死朱瑄官中丞煙屢不炊而心事下信
於閭井小兒鼓鐘于宮聲聞於外不其然乎嗟夫
俗不長厚寡廉罕恥如水赴壑而迄不可止睹其
事使人三嘆

寧波府志卷三十六終

寧波府志卷三十七

傳十三

南京兵部尚書郡人張時徹纂修

寧波府知府直隸安德曾鎰訂正

雋異

宋汪洙字德温鄞人九歲善賦詩時牧鵝黌宮見
 殿宇頽圯心竊歎之題其壁曰顏回夜夜觀星象
 夫子朝朝雨打頭萬代公卿從此出何人肯把俸
 錢修上官奇而召見時衣短褐問曰神童衫子何
 短邪洙輒對曰神童衫子短袖大惹春風未去朝

天子先來謁相公世以其詩詮補成集用訓蒙學
爲汪神童詩登元符三年李釜榜進士任明州教
授著春秋訓詁召陞宮教拜大宗正卿至觀文殿
大學士提舉台州崇道觀築室西山日集諸儒講
學以教授族間之子弟鄉稱崇儒館卒謚文莊平
生稟性仁厚忠孝著聞子思溫觀文殿大學士思
齊端明殿大學士孫大猷敷文殿大學士

王璧字子潤鄞人生而穎異七歲日誦千言一過
輒不忘宣和六年登進士第年少氣銳以遠大自
期悉焚前所爲舉子文披閱羣書蘊蓄日富舉筆
爲文波瀾洶湧朝廷方復博學宏詞科首冠其選
未幾終待次通判以卒士論惜之

陳蒙鄞人年十八上萬言書論國事仕爲淮東總
領官

薛寘字持志昌國人少有文名及長以聖人執權
賦頌鄉薦調衡陽簿時史彌堅帥湖南一日寇起
黑風洞檄寘往撫諭將至有道其姓名者其酋曰
非四明作聖人執權賦之薛寘邪遂投戈而退

姪正子名夢午一名端禮慈谿人生有異質七歲
學小戴禮輒能言其領要邑大夫葉汝明面試中
庸首章義及牧愛堂詩秋水出芙蓉賦皆援筆立
就葉大驚異乃大書神童家三字以旌之九歲欲
應鄉書一時豪雋以賈太傅期之不即偶謁之中
都徧交當世知名士讀所未見書筆力益肆年三
十六始發解未五十遽卒黃東發誄之曰正子起
自童巾而長老先生折節相下起一介布衣而當
世知名士聞風愿交不獲少槩見於世惜哉

姪登孫字廷禮慈谿人天性穎異十歲知屬文與
正子皆英銳早發人稱二難景定間嘗舉鄉貢會
宋運將訖遂退隱雙峯別墅窮究經史百氏久乃
犁然有會於心爲文淵奧宏博超絕蹊逕闢古作
者之域元旣混一用薦起爲國子助教諸生辨疑
質微立館下者日數百人發部擊難無不意滿而
退衣冠儼肅步履委蛇望而知其盛德君子也趙
郡蘇天爵嘗取其文若干篇編入國朝文類

元蔣宗簡字敬之鄞人幼爽敏有雋聲程端禮歸

自江東宗簡以弟子禮謁見留門下數歲凡天人
性命之本古今治亂得失之迹靡不叅究郡大夫
延爲小學師諸生多貴游以其年少頗易之宗簡
於疑義數語而決執文就正隨所治爲之潤頃刻
數十篇諸生始帖帖敬服尋挈其徒寓於蕭寺聚
易詩春秋諸家之說而折衷焉試有司不偶輒棄
去舊作或謂宗簡不以壯盛挾所長取祿仕獨用
古文自詭奚益宗簡笑曰使吾理明氣充於爲文
決科何有得不得命也文有古今之異邪旣而遇

臨川危素於金陵語洽欲偕至京師以母老乃市
所未見書數百卷以歸益折節讀書種學織文爲
世名儒翰林柳貫見其文擊節賞異方具薦牘而
宗簡已屬疾不起年三十有二人以顏子方之

王厚孫字叔載宋尚書應麟孫也八歲能詩十歲
能詞賦操筆立就父昌世入元弗仕登其門者皆
老成博雅厚孫日侍左右面命心傳充積博洽金
華黃文獻潛至鄞薦爲郡庠訓導學者宗之三試
浙闈不偶遂與諸儒講論名教以娛朝夕知者薦

爲郡直學秩滿授象山教諭調浦江甫閱月即解
官歸養後累薦不赴自號遂初老人性介潔爲文
法三代兩漢不事雕飾有遂初集三十卷

姚應鳳字時和慈谿人自幼習家學即以文字爲
業頗自雄其才爲文喜馳驟每屬筆於廣衆中詞
鋒橫逸一座皆驚後持以謁同郡袁楠楠告之曰
子文不受束縛然法度自不可廢也應鳳領之自
是務爲莊重簡嚴日益深邃至元間嘗就試省部
時以龍虎臺命題有司得應鳳賦嘆曰此楚漢故

物也遂擢置高第今其詞猶爲世所傳誦所著有
納軒稿若干卷藏於家

任士林字叔實其先蜀綿竹人徙居奉化再世又
徙埼山自幼穎敏秀拔六歲能屬文旣長喪父廬
墓讀書疊疊不倦諸子百家靡不周覽爲文沉厚
正大一以理爲主而含蓄頓挫讀之有餘味後講
道會稽授徒錢塘文日大肆遠近求請殆無虛日
至大初以中書左丞郝公薦授安定書院山長以
終所著有中易論語指要及松鄉文集若干卷

顧潤字德輝鄆人大父鄉進士應春父學海先生
叔川皆名士潤幼承家學甫六歲即善屬文郡博
士俞希器欲以神童貢不果既長肆力經傳卓然
欲以事功自見閉門却掃默索精思晝夜孜孜惟
寐始忘之垂三十年著釋圖一說約六十三圖徵
二十一希言二十四事剡六十二治要十八體卦
八解八辨十二議二十四傳七記論序文銘各三
檄著十八賦六騷十九檄詩三百二十合三十卷
分爲前後外三集通名爲守齋類藁宋景濂序之

國朝臧性字孟庠鄆人父文清歷清河績溪教諭
學行高于時性蚤習庭訓甫六歲教之蒙求即能
成誦八歲入鄉校日記千餘言授以琴操即知指
法既長究竟書史咸極闡奧永樂丙戌以能書徵
入秘閣繕寫永樂大典書成適戌子大比以禮經
魁京闈明年又魁禮闈授鞏昌成邑令以父老陳
情乞典教鄉邑忤旨謫交趾逾七年用知者薦徵
授陝西道監察御史改直隸良鄉令未幾調宜興
性剛毅不屈持守廉謹爲詩文多出已思不蹈陳

襲故所著有鄞陽藁栢臺藁藏于家

周冕字汝服鄞人六歲讀書日記數千言十三通尚書游邑庠時徐和仲見而器之授之琴輒善琴比長尤玩心字學凡秦漢碑刻晉唐法書必探其精妙梅竹山水遊戲翰墨之事亦無不習才名籍籍一日父敕之曰若非所謂玩物喪志者乎遂股栗而退盡棄所習而務學焉永樂六年賓興于鄉會朝廷纂修大典徵天下博學能書之士郡博士以冕應詔至京與翰林諸學士先生從事十年冬

太宗北狩平胡冕獻頌春宮敬除正字十二年大駕還京遷右春坊司諫日侍講筵竭誠輔導儲皇禮遇殊厚聲望益隆冕愈自謙抑謝紛華遠讒佞每朝退坐一室讀書非召見公事不出客至問寒暄外未嘗一語及朝廷事因號曰訥菴年三十八被譖誅死 儲皇即位改元洪熙首念舊臣遣使驛召冕長子庭授鴻臚署丞給俸讀書

顧慤字存誠司諫道之子少聰警於書無所不讀以文自雄空視四海 仁宗皇帝俯念司諫舊德

詢其後尚書蹇義以愨對詔起之挾裝上京師路
出藩省進謁愨野服拜堂下省臣不與均禮愨起
立不拜抗聲曰朝命起予非庶人役於官者公等
不爲禮愨何敢僕僕自卑省臣訝其言意其中未
必有也指所坐廳事曰堂名紫薇能記之否趣具
楮墨令面爲之愨從容就席展紙濡毫頃刻立就
文不更草書體數家俱備衆皆嘆曰奇才也以上
客禮之陞見擢司經正字聲譽日起然性素抗直
不能隨時俯仰欲因事引退幼喪母鞠于祖母第

趙中和氏值中和沒陳情乞歸爲之哀忌者劾以
非禮謫戍南丹在戍發爲詩章幽憂覃思有柳柳
州之情卒時年二十九有充然子集舜江岑瑩重
其交誼不遠萬里函其遺骨置諸枕中歸葬焉

張琦字廷珍更字宋卿慈谿人天資穎異讀書一
二過輒終身不忘作文有俊才自巾角入庠校負
其才氣旁若無人前輩亦畏憚之正統辛酉中浙
江鄉試時猶未冠及試禮部連不利益自奮於學
文氣浩瀚如峽江春流不可抵禦時海鹽張寧餘

寧波府志卷三十一
八
姚魏瀚嘉興姚綬俱有才名人稱浙江四才子天
順丁丑始登甲第未幾以疾卒

羅信佳字邦彥慈谿人少有異質嘗與同邑桂琛
鄭岑馮璋時中讀書永明僧舍其四人者講讀窮
晝夜一燈聚首每至夜分信佳獨鼾睡達旦及舉
所讀信佳背誦如流至講解京傳四人紛紜未定
而信佳臥其傍以一語決之景泰庚午浙江鄉試
五人同榜大理卿夏時正題其讀書處曰聚奎堂
爲文記之成化丙戌登進士第除南京兵部主事

未幾卒其文字簡嚴人謂其似李泰伯爲人和易
未嘗以才自矜位不滿德人咸惜之子縉亦舉進
士爲監察御史

沈應奇字天瑞永樂間父益代從父琦以閩右徙
實京師應奇生七歲能大字以神童科薦 憲宗
召試命書皇帝字應奇俯伏奏曰書皇帝字乞賜
一几 上奇之字復稱旨命授中書舍人時內閣
萬安輒奏曰應奇年穉當令讀書不宜使有官遂
改送順天府學賜廩之後師楊守陳豐熙授易中

寧波府志卷三十八
正德己卯鄉試與修武宗實錄成復授中書舍人
六年會轉官卒

司馬氏曰靈虵之珠非徑寸而直不貲無瑕之璧
不盈尺而賈連城蓋以異也甘羅十二出奇使趙
聲震諸侯叔度以十四名動公卿間詎可以少年
少之自洙而下凡如干人皆明產也率六七時便
迥然出頭角蒙十八上書言國事寘作執權賦擢
上第名聞土酋至投戈聽撫可異哉靈稟夙殊天
授獨厚殆扶輿清淑之鐘歟

寧波府志卷三十八

傳十四

南京兵部尚書郡人張時徹纂修
寧波府知府直隸安德曾鎰訂正

隱逸

漢張齊芳驃騎將軍意之子歷中書郎退隱句章
之靈山採山釣水以自適人皆賢之遂以其父之
官名其山曰驃騎鄉人立祠祀焉

晉虞喜字仲寧會稽句章人少立操行博學好古
元帝初鎮江左諸葛恢薦喜懷帝即位徵拜博士

皆不就賀循爲司空先達貴顯每詣喜信宿志歸
自云不能測也太康中與臨海任旭俱以博士徵
喜辭疾不赴咸康初內史何充上疏曰臣聞二八
舉而四門穆十亂用而天下安徽猷克闡有自來
矣方今聖德欽明思恢遐烈旌輿整駕俟賢而動
伏見前賢良虞喜天挺貞素高尚邈世束修立德
皓首不倦加以傍綜廣探博聞強識鑽堅研微有
弗及之勤處靜味道無風塵之志高枕柴門怡然
自足宜使蒲輪紆衡以旌殊操一則翼贊大化二
則敦勵薄俗疏奏詔以散騎常侍徵之又不起喜
專心經傳兼覽讖緯乃著安天論以難渾蓋又釋
毛詩畧註孝經爲志林三十篇凡所註述數十萬
言行於世

唐賀知章字季真性夷曠喜譚說與族姑子陸象
先善象先嘗謂人曰一日不見季真則鄙吝生矣
唐證聖初擢超拔羣類科累遷太常博士開元十
三年遷禮部侍郎兼集賢院學士尋遷太子右庶
子充侍讀徙工部肅宗爲太子遷賓客授秘書監

晚節尤誕放遨嬉里巷自號四明狂客秘書外監
每醉輒屬詞筆不停書咸有可觀善草隸好事者
具筆硯從之意有所愜不復拒纔十數字世傳以
爲寶天寶初夢遊帝居數日寤乃請爲道士還鄉
里詔許之捨宅爲觀賜名千秋居焉又求周宮湖
數頃爲放生池有詔賜鏡湖剡川一曲擢其子僧
子爲會稽郡司馬賜緋魚使侍養卒年八十六肅
宗乾元初以雅舊贈禮部尚書初明皇賜歸詔令
供帳東門百僚祖餞御製送詩并叙云天寶三年
太子賓客賀知章鑒止足之分抗歸老之疏解組
辭榮志期入道朕以其年在遲暮用循掛冠之事
俾遂赤松之遊正月五日將歸會稽遂餞東路乃
命六卿庶尹大夫供帳青門寵行邁也豈惟崇德
尚齒抑亦勵俗勸人無令二踈獨光漢冊乃賦詩
贈行云遺榮期入道辭老竟抽簪豈不識賢達其
如高尚心環中得秘要方外散幽襟獨有青門餞
羣英悵別深又云筵開百壺餞詔許二踈歸仙記
題金籙朝章換羽衣悄然承睿藻行路滿光輝

宋李中字不倚奉化人元符元年入太學有才行嗜蘇黃之學崇寧初晦于時於是謝同舍拂袖徑歸大觀中中書舍人鼂說之以上書謫監明之船塲士無敢謁者中從之游不復求仕進識者高之子敦義孫光祖皆以儒業稱

周銖鄞人崇寧二年進士兄弟皆隱鄉人慕之所為文二十卷

史詔字升之鄞人父冀國公簡母冀國夫人葉氏遺腹子也頎秀豐下少有立志嘗與豐清敏舒中

承受業於鄉先生樓郁以孝行聞遇大比輒引避嘗曰無母氏之節已無史氏矣誓終身母子不相離或曰取薦所以榮母也詔曰朝廷設科思得其用敢竊為已榮邪設與計偕則初志爽矣况忘親欺君士君子所不為也大觀二年詔舉八行鄉人以詔應命遂與母避于縣東大田山郡守迹所徃迫使就道誓不起鄉人稱為八行先生後孫浩貴累贈大師越國公

陳顯字文昭鄞人第進士授主簿累遷至戶部尚

寧波府志卷三十一
四
呂
書政和二年蔡京復相顯因對言復用蔡京士民
失望帝怒貶知越州顯不復仕歸四明隱于宓巖
五年復召顯為宣和殿學士辭不起嘗註論語等
書有平山文藁弟顥任司諫亦以疏詆蔡京謫監
酒稅而卒

王奕字謀道奉化人質敏而曠學博而純為詞章
卓有西漢風少舉場屋不利遂棄其業黃冠野服
隱居山林討論經史以興起斯文為已任守令知
其賢率鄉之子弟受學焉沒祠于邑庠

王茂剛鄞人居林村巖壑中有弟不能學問專治
生餬口茂剛刻意讀書足跡未嘗妄出學多自得
超悟傳註之外尤邃於周易沈煥通判州事嘗咨
訪之

鄭若冲字季真鄞人少失怙恃育於伯父章未總
角已奇之稍長力學恥為舉子語與同里汪大猷
陳居仁樓鑰同筆硯相厚善後三人既貴顯未嘗
一造其門自置書塾聚書數千卷延師訓子雖臥
病不廢書嘗書壁自警云一日不以古今澆沃曾

次覽鏡則面目可憎家僅支伏臘躬自節約鄰族
有急拯之恐後方盛年時夢入深塢後營山墅儼
如所夢乃字其溪曰夢溪以自號平居謹飭雖盛
暑衣不露體冠履雖敝無垢口絕戲言坐不傾側
接後進如敵已與人交恐傷其意至於明是非辨
義理雖片辭不少貸學者嚴憚焉子清之相理宗
累贈太師魯國公

蔣璿字季莊慈溪人宣和間師王氏之學閉門窮
經不妄與人接高閑居明州城中每過訪其廬輒
相對小室極意講論自晝竟夜殆忘寢食或問閑
曰蔣君不多與人周旋而獨與君厚何也閑曰閑
終歲讀書凡有疑未判與缺而未知者每積至數
十輒一扣之無不迎刃而解蔣君所長他人未必
知之閑得爲知己幸矣

卞大亨字嘉甫先泰州人初由鄉舉入太學升舍
有聲靖康中携二子走行在丞相范宗尹以遺逸
薦後特恩調懷寧簿未幾隱居象山手植萬松于
徑行吟其間自號松隱居士好讀左氏傳及遷固

諸史爲詩歌擬杜少陵素習養生精醫卜之書著
松隱集二十卷尚書類數二十卷改註杜詩三十
卷傳信方一百卷子園登梁克家榜進士授揚州
倅人稱卜夫子

高友文字仲章其先汴人武烈王瓊之後建炎間
子孫隨駕南渡遂家于鄞友文性端謹學問該博
舉進士調泰州如臯尉初志欲仕以養親親沒築
室墓左絕口不談名利客有誚之曰子方筮仕正
宜樹勛伐以顯門戶何至沉沉自甘枯槁乎友文

歎曰祿以養親親亡矣何以仕爲屢薦不起曾孫
夢說風儀閒雅嗜讀書清心寡欲不事華靡喜賙
困乏至解衣推食無吝色浙帥王本齋招致鄉校
以式後進不赴東湖書院有先進祠祀鄉先生陳
禾等十人友文夢說皆與焉

劉準先餘姚人後有名昇者仕慶元遂家鄞準自
幼好學長而有成當宋末知國事日非隱居教授
絕仕進意以甬東負郭非隱者居即卜築青山之
原依先壠而家焉日以教子讀書爲事學者稱爲

南憲先生子汝舟字端父確守父訓平居無戲言
情容郡之名士大夫相繼來居一時林下衣冠爲
盛戶屢常滿汝舟用呂氏鄉約身率而推行之苟
非其人輒謝絕之不附權勢不事請托不入城府
不語及州縣得失務本節用有餘則以濟人
劉應時字良佐慈溪人性敏而勤於書無所不讀
遜居林下刻意於詩興寄瀟散范至能深賞之所
著有頤菴藁

錢埴字深雲祖億宋乾祐間判明州子孫遂家于
鄞埴世居東錢湖之里讀書尚節槩不事侈靡晚
年別築一室植松竹以自况日與同里高友文談
論經史得一善則佩服不忘鄉人敬慕之

陶椿卿字均壽定海人以禮經魁宋末癸酉鄉試
覆試又魁父回孫登咸淳進士倅平江府而卒廬
墓終身元初被選舉力辭不起鄉邦異之

黃玠字伯成定海人宋寶章學士震之曾孫自幼
聰敏善記比長服膺先訓博洽無不通志尚卓然
不隨俗進退躬行力踐以古聖賢自期隱居教授

孝養二親聞其名者爭遣贄迎致之每渡浙而西
富家宦族尊其德學爲築館舍贖田產以居之樂
嘉興山水之勝卜築弁山遂號弁山小隱與趙文
敏公子昂黃文獻公晉卿相友善所著有弁山集
知非藁纂韻錄唐詩選各若干卷行世卒年八十
翰林學士鄒緝等撰狀銘從祀嘉湖寓賢祠

元趙偕字子永慈溪人幼老成不凡初業舉子嘗
讀楊文元公所著書恭默自省乃悉棄舊業尊崇
之雖處山林恒有憂世之色邑令陳文昭親至門

受學平居躬行孝友日舉聖賢之言以裁小子在
簡學者稱爲寶峯先生

孫庚字居純慈谿人生而穎悟志操端謹孝友稱
於鄉里嘗從師力學同舍生以其貧相斥遠庚不
動容色刻苦磨厲夜坐達旦由是問學淹貫論議
洪博及門若桂彥良王桓陳恭皆以學行著聲其
他執經請益者遠近相踵庚善誘之雖愚蒙陋劣
必使知所趨向貧不能備束修者弗棄識者多之
邑長也其不花天澤普化成以師禮禮之及卒貧

不能歛門人執喪葬禮所著有雪磯集若干卷
徐禹圭字天錫其先奉化人父景山宋末辟監酒
韓畧坊遂家于鄞禹圭甫韶齒有成人志與弟禹
疇皆刻勵好學家貧無書晝抄夜讀雖躬耕隴畝
弗倦于勤受業鄉先生汪元春門兄弟自相琢磨
以治舉子業禹圭嘗兩中浙江鄉試卒以母老不
仕晚年教授鄉黨其導人專以收放心養德性爲
本時程端禮歸老子家相與討論默契心融生徒
從者遠近如歸門人因其里居咸稱曰梅江先生

禹疇字天彝亦嘗試藝于鄉值元季遂隱居泉石
講學訓徒餘五十年弟子有三世從之者爲人沉
靜無疾言遽色壽八十四卒

史公珽字楮叟鄞人丰姿秀爽詞氣溫恭早志于
學通諸經子史尤邃於易延祐間詔郡守舉行堂
試法公珽方弱冠屢占前列同里鄭奕夫時以道
學文章自任述作論撰必俟公珽鑑定然後出藁
家居教授生徒務底于成程端學薦于甬東書院
主奉即棄去遊西州陶寫性情論宋季臺閣故事

鹽鹽終日及忠臣義士死節者必慷慨流涕廣平
李堯民七喪不舉公挺解囊中半賙之且爲著哀
辭告其常所往還者自號蓬廬處士所著有蓬廬
藁易演義及象數發揮若干卷

謝暉字彥實先資陽人識見通敏聞武康石塘胡
長孺以德學淑後進往受業其門或勸習舉子業
答曰學以博通古今資文行耳仕奚所急哉時趙
文敏公以書名天下見而愛之授以書法比家居
藩帥郡守詣門請交一無所求爲詩文簡淡雋永

作字亦有法人以得其尺牘片楮爲榮暉亦不自
秘惜求輒應之有所不可雖貴勢不能動也與人
交一以義人有一善必揚之足未嘗入城府

陳應麟字天祺鄞人淹貫經史至曆數之學無不
究其指歸人稱通儒一日乘馬出有失馬者亟前
認馬應麟問曰子亡馬幾何時對曰逾月矣應麟
有馬數年遂與之挽轡而去明日馬從別得乃詣
應麟叩頭謝庭下至元間朝廷以安車召賢良應
麟謂使者曰吾祖宗世爲宋臣子孫不忍食元祿

固辭不起賜號純德先生時趙文敏公嘗為逸民詩以美焉

葉孟傳字拙修定海人隱居不求聞達讀書為文必根於理邑諸生慕其學行爭及門受業家貧晏如未嘗少屈於人

陳子翬字象賢奉化人負器幹精藝文書法李邕嘗為慶元路教諭因國事日蹙遂隱居田里日與高橋章壘甬東鄭奕夫剡源徐本原胥問難麗澤經生學子爭及門受業雖處寂寞每風晨月夕載

酒溪山之上賡唱迭和以發舒懷抱所著有思剡集藏於家

汪顥字季夷汪瀚字幼海兄弟也奉化黃甘里人父懋卿初與弟森卿同學同貢並因宋革不仕杜門著書顥瀚受家學治易春秋躬耕孝養顥從海陰陳晷伯講學著有詩文曰蠟臺景顥先卒瀚為知州馬稱德薦于憲臺授衢州路學錄辭不赴國朝洪武初府文學單有成奉使采修實錄書二貢士于宋書二處士于元真一門盛美也

國朝薛敬字原禮鄞人宋進士朋龜九世孫容儀魁偉稽古好修嘗典教象山秩滿調鄞時元政不綱退隱于鄉以醫術自晦國朝公卿大夫凡蒞茲土者聞其賢必虛左以迎訪問時事

胡敦字仲厚鄞人家世業儒幼不好弄成童日課數千言既長潛心經史得其指歸與後學講說懇懇不倦晨夕衣冠如對大賓雖童稚必束帶見之人有過未嘗發諸口每芳辰勝旦衣冠高會賡唱迭和若與世相忘經史之暇旁精醫卜之書而尤嗜寫山水人物頗自秘惜非其人雖投以重幣弗屑也好義輕利人多高之

烏本良字性善慈谿人幼同弟斯道講論經史作詩習字爲先達所推獎父沒儲無甌石日營以奉母時斯道方弱冠季弟二女弟三皆在齠齏仰給焉遂授徒錢唐以自資時大家有願以女妻之者本良曰此來爲母與弟衣食計耳所願未遂何暇及婚事後撫二弟稍長畢嫁女弟始婚一日得慈湖楊文元公遺書及春秋易解自謂如坐春風中

遂以春風名齋

毛倫字有倫鄞人世居樵源之烏巖洪武初徙城西買田築室自號半村居士日以談經論史爲事甲戌應薦入覲以母老乞侍養賜歸孝誠益篤母沒喪葬如禮晚年與鄉先生陳中復烏斯道徐和仲優游半村之間以詩酒琴棋爲樂倫爲人慷慨不事諛佞博古尚禮一時賢士大夫咸雅重之孫弘舉進士爲給事中

張庸字惟中慈谿人少失怙能自力學弱冠以詩鳴與同邑桂彥良相友善孜孜講習日益深廣洪武六年有司特起之以疾告歸歌詠自娛一日病篤忽憶里人請賦歸鴻軒詩夜半口占令子允直書歌一章音節不紊言訖而逝有全歸集

宋吉祥字履坦奉化人性質明敏幼孤受祖訓讀書日誦數千言經傳子史靡不淹貫考正喪服教授鄉里及門之士以千百計多顯名者晚年好松憇而樂焉自號松隱人稱松隱先生

田致平字叔衡奉化人平生讀書施藥爲詩累千

百言字用章草篆隸書帖應答無倦初爲鄉里童子師比老不出方丈之室號夢覺關客至敲竹呼茶聲不峻發夜不就枕年九十餘卒平生勸人爲善絕無侵忤行誼表於一鄉

劉德名字世嘉定海人研涉六籍羣史處山海奧僻文不耀世耕植自給雖至困乏裕如也平居盛服端坐絃琴賦詩以自適後學問難輒竭中以告時同邑高士若夏儼陳端禮皆以文行重於時周禮字吾學鄞人天性剛介不爲諛佞談諧窮研

六經百氏感時憤事則寓於詩文詞多豐腴無山林枯槁之態晚年授徒日湖之上講學論文他一無所營從弟冕任司諫濂禮部郎中子爰咨國子博士皆以詞翰發身

陳觀字孟顥鄞人丰儀俊爽習次灑落儼然神仙中人遺棄榮利惟讀書好古以自見郡大夫累辟不起永樂間召寫五經四書性理大全書書成上敕銓次用之乃引身乞歸與名卿碩儒賦詩講道暇則徜徉竹林花塢之間絃琴奕棋以自娛

金華字宗實鄞人洪武間從戍燕山衛值文皇靖內難守通州有功召見時弟忠以近幸授兵部尚書上欲推恩與華辭不就賜歸徙東湖韓嶺居焉足不履城府日坐斗室寄情經史手點書餘萬卷至老不懈遇朋從往來詩酒為樂興至汎舟湖上釣月吟風竟夕而還後尚書公迎養於金臺官舍未浹旬謂曰萬鍾之富其如我湖山樂何遂拂袖而歸永樂乙未尚書公卒復召見賜白金文綺華伏闕謝曰臣布衣野人不敢用此上稱為

迂叟一日讀宋鑑至王倫附秦檜事撫掌發歎脫頤而逝人稱為白雲先生

王毓字用賢鄞人貌清而癯性溫而厲讀古人書用以自淑嘗慕宋廣平林和靖之為人植梅庭下雖凝陰沍寒焚香默坐對之不去因寄之模寫標格勁瘦天機呈露賦詩尤工于長歌隸書亦有新意時稱三絕自號香雪坡老人先游錢塘無識者題城隍廟壁曰行盡錢塘數十家無人會我煮新茶一襟清思難消遣嘔出曾中萬斛花由是人競

延請拂衣而歸

吳宗亮字孟曦先餘姚人讀書善詩文烏斯道稱其清雅俊逸人莫能儷洪武初有司以文學薦出遊于鄞善其俗尚淳龐遂迎母以居永樂間郡守魏琮數延問政治得失對皆切中益欽異之

陳煒字光大慈谿人丰儀如玉衣冠灑然讀書過目輒記旁通律數之學洪武中有司累薦不起晦跡林下畜鷄豚藝果蔬釀秫爲酒時與賓友昆弟酣歌笑詠傲睨乾坤同里余處道邑令余瑄廉其

讀書強之仕辭疾弗就皆稱高尚

陳端禮字履中定海人志操古雅博究羣籍動不踰矩壺闕整肅不聞內言集子弟講明經術謂聖賢之學自修身正家以達于天下勿事章句弟治從子憲相繼登第爲御史端禮作廉說以規之嘗曰汝輩盡忠朝廷不負予教予得肆情泉石矣乃築室別墅遂意著述時鄭瑤爲郡守行鄉飲崇尚齒德親詣端禮之門迎之八閩志爲載其事謂賓主俱賢有裨風化云有喪祭禮儀註解

紀宗德鄞人博洽經史下筆輒成章弱冠教授里
閭嚴立條約而以身先之諸生莫不欽服有顯名
者孝養二親持已敬而與人忠論者以篤行稱之
尤習國家典故永樂中與修郡邑通志精敏先於
諸生性不樂仕進嘗徵至京陛對稱旨欲授以職
固辭不拜後屢辟不起於所居東偏闢一小齋襍
植卉木日焚香晏坐一切世俗紛華泊如也于時
有陳孟顥李孝謙楊九疇王用賢王叔禮章審言
皆高士相與遊從賦詠自餘不以屑意語在門人

洪常郎中所爲傳中

楊範字九疇鄞人踐履誠確雖燕居恒盛服端坐
讀書至夜分不懈教授里中視世之毀譽榮辱漠
如也永樂間有巫稱龍神道人禍福如響家趨戶
迎官不能禁範作文喻之弗止躬往見巫捽其首
匍匐于地時擁巫羅拜者百數十人皆驚悟散去
郡守鄭瑤邑令張鐸咸賓致以訪政事初號栖芸
晚年更號思誠叟所著有四書直說道統言行集
栖芸藁詠物百詩菊花百詠孫守陳守隨守隅守

陞曾孫茂元茂仁皆登顯仕

向道淳字永修慈谿人幼傳家學得慈湖寶峰之宗架插遺文多宋僕射薌林舊籍精研博采反求于心卓有匡濟天下之志及父朴死靖難裋衣冠葬陽嘉山手樹松楸灑泣輒瘁遂棄科舉業杜門教授事母徐極孝與顧慤爲忘年友慤被召顯榮欲與彙征淳笑不應慤既被謫始服其明哲後督府斷事張深知淳強上其名竟稱痼疾不起

周陞字孟褒慈谿人爲人介特隱居教授不慕聲

利居于市廛一室如舟所儲書史外無他長物因號書舫齋爲古詩詞音調高古不類時人每酒酣則擊節歌陶淵明詩四顧慷慨旁若無人
錢珏慈谿人古道自力不慕榮名雖獨處宴室不廢冠履容止瞻望未嘗傾側遇天日晴美輒遊里閭間步履有循而儀觀整肅不問皆知其爲溪雲先生也性好吟詠口吃若不能言至其爲詩清麗雄渾得少陵家法有和唐音并溪雲稿行於世
孫玉字彥暉慈谿人少有至性洪武中其父爲人

所誣械發京師卒於道玉年十二即匍匐返櫬歸
葬既長家日貧授徒養母不廢甘旨弟妹婚嫁自
任其費猶力學不懈工詩善草書知府李春嘗舉
賢良方正又有以明經薦者皆不就郡邑長吏多
屈節下之

岑俊字子英慈谿人隱雲巖通經史百家工書學
篆隸尤入妙古詩出入漢晉嘗授徒吳興有錢氏
子負所寄一無所詰由是人目爲長者正統間提
學僉事花潤生舉經明行修以親老辭平生悃悞

無華口未嘗言人過至治家喪葬一以禮年九十
疾革猶與客誦所評魯男子詩云雨崩鄰婦屋風
烈夜難禁閉戶却逃難全無惻隱心語異奄逝

李端字文正鄞人天性恬淡不嗜名利家居端嚴
與二弟同爨至長子孫諸子斬然十人名課耕讀
朝夕待教誨不懈郡太守禮爲鄉校師規誨整肅
迄今稱師模者必曰李端先生云爲詩逼唐人時
與金太僕湜倪處士光魏學博偁締爲詩社東夷
貢使歸懇求端詩爲贈有肩挑雲影江頭別衣帶

寧波府志卷三十一
天香海上還之句夷人傳誦焉尚書楊公守陞贊
之云人徒見其漁獵子史馳騁古今而莫能窺其
自得之中襟蓋鄉評也孫循義舉嘉靖癸未進士
爲諸生時連不得志於主司上書自陳主司怒欲
加譴乃試以滄海遺珠賦卞和泣玉論蓋窘之也
循義應命而成文不加點率奇詞奧義遂以才名
聞于天下仕終衡州知府

張鈇字子威慈谿人幼端慧卽爲外祖司空王來
所器識及長博學強記綜貫經史百家再試場屋
不第遂棄去攻古詩文兼工篆隸真草開口論天
下事疊疊竟日不竭聞人之善雖遠必赴亦有接
里閭而不通往來者燕居獨處必正襟危坐高風
逸氣傲睨物表云所著有碧溪詩集南臯詩話郊
外農談咏史百絕等藁藏于家

黃綬字汝文鄞人早以能文著名庠舍舉甲戌進
士卽在告久之授兵部職方主事進員外郎不樂
仕進時有山林之志乃力求補外得山東僉事不
赴遂疏乞致仕屢有剡薦固謝不起夷猶泉石平

寧波府志卷三十八
生活於嗜慾於外物一無慕尚體故素羸惟節飲食治藥餌凝神葆和老更強壯年八十二而終
司馬氏曰務光義甚高眇堯天下而以潁陽自貴商山之芝不辱溺冠之帝披裘負薪礫視遺金人各有見哉志意修輕富貴仁義重藐王公虞喜不應散騎之招賀監乞鑑湖歸鴻冥鳳舉逸駕疇攀哉四明信樂土山海輿區顧長往不返要在自行其欲也亦曰茹芝負薪之流亞云爾

寧波府志卷三十九

傳十五

南京兵部尚書郡人張時徹纂修
寧波府知府蜀威遠周希哲訂正

流寓

梁陶弘景字通明丹陽秣陵人幼有異操年十歲得葛洪神仙傳晝夜研尋便有養生之志及長讀書萬餘卷劉宋末為諸王侍讀奉朝請雖在朱門閉影不交外物唯事披閱朝儀故事多取決焉永明十年脫朝服掛神武門上表辭祿於是徧歷名

寧波府志卷五
山尋訪仙藥至永嘉安固山中棲止永元初築三
層樓弘景處其上弟子居其中賓客至其下與物
遂絕唯一家僮得侍其傍特愛松風聞其響欣然
樂之時或獨遊泉石望見者以爲仙人性圓通謙
約出處冥會心如明鏡遇物便了言無煩舛好著
述尚奇異顧惜光景老而彌篤尤明陰陽五行風
角星筭山川地理方圓產物醫術本草著帝代年
歷又造渾天象梁武帝舊與之遊及即位恩禮逾
篤書問不絕冠蓋相望帝嘗問山中何所有弘景

答曰山中何所有英英多白雲只好自怡悅不堪
持贈君給之黃金朱砂等物合爲飛丹色如霜雪
服之體輕賜以鹿皮巾屢徵不起然國家大事咸
咨詢焉時號山中宰相善辟穀導引之法年逾八
十而有壯容深慕張良之爲人云古賢莫比曾夢
佛授以菩提記名爲勝力菩薩乃詣鄞縣阿育王
塔自誓受五大戒後又煉丹於象山棲霞觀丹投
井中泉味甘冽及太宗臨南徐欽其風素召至談
論數日而去甚敬異之大同二年卒時年八十五

顏色不變屈申如恒詔贈中散大夫諡曰貞白先生

唐倪九疇平陽人昭宗時官招討副使後泛海隱于象山好義樂施土人懷之

宋蔣猷字仲遠先丹陽人後避寇徙寓昌國卒葬於蓬萊鄉徽宗朝積遷中書舍人善書命學者宗之擢御史中丞上疏論士風浮薄羣臣無它能善俟候人主承望大臣而已故事內侍省隸六察崇寧中宦者竊弄詔旨奏免所隸猷疏駁正廉得內

侍省劉友端等違擅事復論楊戩童貫不宜受上賞上力護之猷復言范之才使淮南出鼎事宜坐狂妄趙良嗣降虜後必誤國東南應奉花石今年皆入權倖願速罷之不報後爲吏部尚書以徽猷閣直學士奉祠欽宗即位貶童貫貫時侍徽宗總兵柄東巡猷持詔立諭貫解兵改知明州到官數日以不善應奉丐罷以徽猷閣直學士致仕

陸寘字元法先會稽人尚書左丞佃五世孫崇寧中爲明州錄事奉行安濟居養二院并漏澤園有

勞尋除通判後爲淮南江浙荆湖發運判官建炎
間卜居於鄞奉祠垂三十年工詩善篆隸手抄經
史洎釋老書數百卷悉加籤校子光官至奉直大
夫其後孫曾合采燭熊點哲甫珽皆踵世科

張邵字才彥其先和州烏江人宣和三年登上舍
第建炎初假禮部尚書使金補其弟邨爲明州觀
察推官奉母居于鄞卒塋鄞縣之雷峯因家焉邨
子孝祥生於雷峯第邨繇邵恩補官後爲提舉江
南東路常平茶鹽公事始邨爲鄂州提舉軍事張

平擅戎事邨結爲兄弟會帥入朝奏邊事營卒挾
刃貸富民民畏不敢言邨知之馳入平營平趣治
酒邨笑曰飲何辭願得脅貸富民者平大愬立索
斬之子孝伯官參知政事有政事韓侂胄立黨論
孝伯曲調護之孝伯子即之幼學伯父孝祥書人
多珍之

朱翌字新仲舒州瀟山人漢桐鄉嗇夫邑之後以
太學生賜第初爲溧水簿高宗南渡爲秘書監屬
喜其材俾預修徽宗實錄方是時范仲領史局翌

以文辭進刪潤居多秦檜相逐趙鼎翌以鼎黨謫已而得釋朝廷憫其饑寒計貶所十四年衣俸悉與之遂卜居鄞翌敦睦宗族其父司農卿載上貧幾不能葬翌著文以示子孫作信天緣堂記其畧

曰三十餘年屏跡荒縣私念少時始官州縣月俸錢萬二千米石五斗麥如米之數十口之家取足已而官朝廷祿十倍之然日食肉猶一鬻衣常百結室亦屢空南來已老內外食者四十人婚姻賓客伏臘不論論其常用一歲錢千二百緡米百八十斛炊煙屢絕家人以罄告呼使前曰天生匹夫一飯前定多圖未必得坐視未必失世豈有一門同日困於無飯者乎天之所賦自應不闕轉告而朋洗釜待之行有餉予者有老媪在傍大笑曰翁豈信天緣乎遂以名堂書其說於壁死自為誌

周丞相必大論其詩似杜牧之而出處亦相類號省事老人有文集四十四卷

顧主簿不知何許人南渡後寓於慈谿廉介有常安於貧賤不析人之知即細事不苟平旦起俟賣菜者過門問菜把直幾何隨所言酬之他飲食布帛亦然久之皆信服不忍欺一日用足則玩心墳典不事交游里中有不安其分武斷疆忤者相與譏之曰汝豈顧主簿邪其為人推譽若此

郭維河南人父貫官奉議郎終於長沙判官宋建炎間維徙居四明以北學教授諸生從者如雲墓

于西湖之原榜曰郭先生墓外請土葬政和五年直龍圖閣知明州因家奉化稱清真先生有清真集

韓元禮字敬仲鄴人淳熙九年進士光宗時授中書舍人言事忤旨謫象令開禧二年改松溪王津事發黨籍禍起以有惠於象遂泛海至其邑西南鄉居焉

楊煒字文光登進士第授左從政郎欽宗梓宮歸舉朝忻賀煒獨表請驗視真贗秦檜方主和議煒移書參政李光責之檜深啣下煒獄後知黃巖縣有濬河功世家華陰歷遷越煒始占籍鄞之櫟斜黃龜年字德紹福州人後葬父於鄞因家焉舉進士第爲殿中侍御史與諫官劉棐論秦檜行類莽卓特朝廷未之察檜繇是罷相時呂頤浩與檜交惡龜年乃頤浩引薦人咎其過至檜再相卒如龜年所言龜年寓湖州檜撫其過押回福州後居昌國之馬鞍山品題泉石與兄岳年同隱焉山有石面平五丈與僧馬耆處士張光賦詩於碧雲菴檜

死復居於鄞

元謝昌元字叔敬西蜀資州人類試四川第一調
紹慶府教授後守施州開慶元年除太學博士遷
太常博士知封州提舉廣東常平茶鹽奏蠲監銀
以寬民力疏入不報捐俸代償之爲沿海叅議官
因家於鄞德祐元年以著作郎遷秘書少監當開
慶初長子大椿挈其家屬來舟由鄂州世祖駐兵
江澣獲其舟以大椿歸甚愛之俾給事殿中十四
年世祖平宋命大椿召昌元入朝上深器之呼爲

南儒預議中書省事爲禮部尚書上疏言增軍餉
結民心除舊吏戢新軍上允其議又乞行選舉收
遺書擇按察官嚴賊吏法置登聞鼓院至元混一
之際凡朝議昌元皆得預聞後以老告歸卒葬於

鄞

馬易之名乃賢本葛邏祿氏漢姓爲馬世居西北
之金山後爲南陽人其兄塔海仲良宦遊江浙易
之遂家於鄞博學能文尤長於歌詩志尚高潔不
屑爲科舉利祿之文平生所爲歌詩不規規雕刻

藻飾而溫柔敦厚清新俊逸嘗遊京師出入英俊間每出一篇士人輒傳誦之至正間用薦爲編修官需次於家久之郡守聘爲東湖書院山長未幾編修命下入京就職時桑哥失里同知樞密院事領軍東薊州辟爲從事官後廷命移軍直沽易之病風瘖而卒所著有金臺集海雲清嘯集行於世胡世佐字伯衡天台寧海人祖三省嘗註資治通鑑以儒業傳家世佐從學於舅氏宋祕書少監陳本堂先生通五經累舉不第授徽州明經書院山

長陞徽州路教授遭時不靖弗果行慶元路總管阿般圖知其賢招致郡庠爲五經師以淑後進遂家於鄞至正二十二年中書叅政危素薦授江浙儒學副提舉不赴文學德行爲時所重云

吳志淳字主一以字行其先曹南人父仕湖北荆西肅政廉訪司經歷主一工詩善草隸以父廕歷官靖安都昌二縣簿適元季棄官寓鄞之東湖至正末執政奏除待制翰林命下爲權倖所匿

揭泮字伯防荆楚人僉斯子少淳朴苦學同舍生

以成誦出嬉遨汰獨坐諷不休夜藝薪以繼必精
熟乃已年十八盡通六經大義攻古文詞侍父於
燕補太學生端方有威儀六館士敬憚之或譁笑
方殷聞汰履聲輒止以廕補秘書郎遷國史編修
歷官至肅政廉訪司事守建寧偽漢陳友諒兵寇
松關建寧受圍吏民相繼出奔汰與經畧使普顏
不花協謀禦賊設方畧復延平等三州改江西行
省未赴以工部郎中召時淮浙亂道不通留家四
明之慈谿予樞浮海趨遼東制授刑部侍郎既而

順帝宵遯乃南還

國朝高明字則誠温州瑞安人少以博學稱嘗言
人不明一經取第雖博奚爲乃以春秋登至正乙
酉第授處州錄事有能聲後改調浙東闔幕都事
四明獄囚多寃明平反允當人稱神明轉江南行
臺掾數忤權勢又轉福建行省都事道經慶元方
國珍強留置幕下不從旅寓鄞之櫟社沈氏以詞
曲自娛因感劉後村死後是非誰管得滿村爭唱
蔡中郎之句乃作琵琶記傳於世 太祖御極聞

其名召之以疾辭使者以琵琶記上上覽畢曰五經四書在民間譬之五穀不可無此記乃珍羞之屬俎豆間亦不可少也後抱病還鄉卒於寧海時

陸德暘有詩哭之云

亂離遭世變出處嘆才難陸地文將喪憂天寢不安名題

前進士爵署舊郎官一代儒林傳真堪入史刊

陳遠字中復一字中孚先濮之鄆城人生而穎悟讀誦一過輒不忘弱冠遊學宣饒間從中書左丞韓伯高授易得專門奧旨工書法有晉人風度藝事無不研習而尤善模寫人物過四明愛俗尚淳

厚遂家焉太祖召至闕廷命寫御容賜金帛以文淵閣待詔歸里成祖嗣位遣中貴驛召入覲賜賚益厚憫其年老賜歸遠為人清峻剛直毅然不可犯而意度閒雅接之則和氣藹如故士大夫多敬慕焉

丁鶴年先西域人父職馬祿丁徙居武昌鶴生甫十歲竝然如成人其俗素短喪唯鶴年服斬衰三年先武昌公以鶴年倜儻類已俾廕從父桓州職鶴年辭謝益厲志文學年十七通詩書禮三經元

至正間淮兵渡江襲武昌鶴年奉母以行備歷艱
阻聞從兄吉雅謨丁爲定海令徒步往依焉薦章
凡九上皆辭不就既而兵戈四起鶴年深匿海島
轉徙無常入越國朝占籍定海鶴年久處艱瘁隆
冬衣不掩脛濟之者雖餽粥之費無所受泊然不
樂仕進凡憂憤愉悅皆發之於詩古體歌行渾厚
清麗尤工七言律其音節格調絕類杜子美而措
辭命意則馬伯庸陸天錫余天心之儔匹也所著
有海巢集行於世

季善字原善先山東東平人父灝仕元爲三山巡
檢遂家慈谿善刻苦磨厲篤志問學處窮約筆瓢
自樂襟度裕如喜怒不形於色人莫窺其涯涘嘗
扁所居之室曰人性皆善日吟哦其中人羨其詩
詞豪放目之曰小李白所著有崇陽藁

胡舜咨先會稽人後徙居慈谿家貧力學淹貫五
經與金華戴良蛟川丁鶴年同邑烏斯道相友善
鈞玄索奇俱以文學見重工五七言律格調清雅
高者逼李商隱孟浩然洪武中有司禮聘訓導邑

庠弟子員教有程度出其講下者多有文名所著
累帙學者至今猶景慕焉

司馬氏曰延陵以季子得名富春以嚴光垂譽人
爲地重尚矣故賢人君子過化之都或棲隱之處
卽爲名區而後世忻豔指顧有餘榮焉吾明本山
海奧域素稱樂國古昔以來凡諸避地之賢與選
勝之士棲遲而土著之者耿光餘韻照映泉壑何
啻管寧之居遼義之之適越也好事者試一覽睹
一以慶山川之遭一以悼彥哲之瑣尾乎

